

每週經課朗誦經文 (巴克禮漢羅/教羅) 2012/01/01

主顯節主日-共同經課-1 以賽亞書第六十章一節~六節

1 起來 ah, 發出光; 因為你 ê 光已經到, 耶和華 ê 榮光發現, 照 tī 你 ê 頂面。 2 看 ah, 烏暗 beh 蓋全地, 烏烏暗暗遮蓋列國; 總是耶和華 beh 發現照你, 祂 ê 榮光 beh 出現 tī 你 ê 身上。 3 列國 beh 來就近你 ê 光, 君王 beh 來就近你發現 ê 大光。 4 你 kiáh 目看四方, in lóng 聚集來你 chia; 你 ê 眾 kiáⁿ tùi 遠遠來, 你 ê 眾 cha-bó-kiáⁿ 亦 beh hō 人抱來。 5 Hit 時你看見就有榮光, 你 ê 心大 gông-ngiáh, 大開闊; 因為大海豐盛 ê 財物 beh 轉 tng 來歸你, 列國 ê 財寶亦 beh 來歸你。 6 Kui 陣 ê 駱駝, kap 米甸以及 Í-hoat 單陵 ê 駱駝, beh 遍滿你 ê 境內; Sī-pa ê 眾人 lóng beh 到; beh 帶黃金乳香來, 亦 beh 報傳耶和華 ê 名聲。

主顯節主日-共同經課-2 詩篇七十二篇一節~七節, 十節~十四節

1 所羅門 ê 詩。 1) 上帝 ah, 求你將你 ê 判斷賞賜王, 將你 ê 公義賞賜王 ê kiáⁿ。 2 伊 beh 照公義審判你 ê 百姓, 照公平判斷你 hiah-ê 困苦 ê 人。 3 大山 beh 因為公義, hō 百姓平安, 山 á 也 beh án-ni。 4 伊 beh kā 百姓中困苦 ê 人判斷, 伊 beh 救 sòng-hiong ê 人, 伊 beh teh 碎暴虐 ê 人。 5 人 beh 敬畏你日久月長, 直到萬世代。 6 伊 beh 降臨親像雨落 tī 已經割 ê 草, 親像及時 ê 雨潤澤土地。 7 Tī 伊 ê 日子義人 beh 興旺; 大大平安 kap 月平久。 10 Tha-si kap 海嶼 ê 列王 beh 進貢; Sī-pa kap Se-pa ê 王 beh 獻禮物。 11 列王 lóng beh 仆落拜伊, 萬國 lóng beh 服事伊。 12 因為 sòng-hiong 人求叫 ê 時, 伊 beh 救伊; 困苦無依 oá ê 人伊也 beh 救。 13 伊 beh 憐憫清淡 sòng-hiong ê 人, 伊 beh 拯救 sòng-hiong 人 ê 性命。 14 伊 beh 救贖 in ê 性命脫離壓迫 kap 暴虐; 伊 beh 看 in ê 血做寶貝。

主顯節主日-共同經課-3 以弗所書三章一節~十二節

1 因為 án-ni, 我保羅, 為 tiòh lín 外邦人做基督耶穌 ê 囚犯, 2 lín 若 bat 聽見上帝為 tiòh lín 所賞賜我恩典 ê 職份, 3 就是用啓示 hō 我知 hit-ê 奧妙, 親像我已經有大略寫 ê, 4 lín 讀伊, 就會曉得我知影基督 ê 奧妙, 5 是前代未 bat hō 人知 ê, 無親像現今 tī 聖神啓示伊 chiah-ê 聖 ê 使徒先知一樣, 6 就是外邦人 tī 基督耶穌, tùi 福音, 同做後嗣, 同做一個身體, saⁿ-kap 有份 tī 所應允 ê; 7 我做 chit-ê 福音 ê 差用, 照上帝恩典 ê 賞賜, 就是照伊 ê 權能所運行來賞賜我 ê, 8 我是眾聖徒中 siōng 第一細 ê 得 tiòh chit-ê 恩典賞賜我, thang 將基督 boē 測度得 ê 富有傳 hō 外邦, 9 也 hō 眾人 lóng 明白 chit-ê 奧妙是怎樣安排, 就是歷代以來 khng 密 tī 造萬物 ê 上帝 ê; 10 taⁿ beh tùi 教會 hō tī 天裡 chiah-ê 辦正事 ê, 有權能 ê, 知上帝百般 ê 智慧, 11 照伊 tī 咱 ê 主基督耶穌所定 tiòh 萬代 ê 旨意; 12 tiàm-tī 伊咱 chiah-ê tùi 信伊, 有好膽 koh hāi-chāi, 來親近上帝

主顯節主日-共同經課-4 馬太福音二章一節~十二節

1 當希律王 ê 時, 耶穌已經出世 tī 猶太 ê 伯利恆, 有幾 nā 個博士 tùi 東方來到耶路撒冷, 2 講, 出世做猶太人 ê 王 ê tī tá-lòh? 因為阮 tī 東方有看見伊 ê 星, chiah 來 beh 拜伊。 3 希律王聽見就 peh-pak, thong 耶路撒冷亦是 án-ni。 4 就聚集眾祭司頭, kap 百姓間 ê 經學士, 問 in 基督 tiòh tī 甚麼所在出世。 5 In kā 伊講, Tī 猶太 ê 伯利恆; 因為先知有記載講, 6 猶太地, 伯利恆 ah, Tī 猶太 chiah-ê 頭人中, 你 lóng m̄ 是第一細 ê; 因為 beh 有一個人君對你出, 來照顧我 ê 百姓以色列。 7 Tùi án-ni, 希律暗靜召博士, 對 in 詳細查 hit-ê 星出現 ê 時。 8 就差 in 去伯利恆講, Lín 去詳細探聽 hit-ê 嬰 á ê 事; chhē-tiòh 就來 kā 我講, hō 我也 thang 去拜伊。 9 In 聽王 ê 話就去; 忽然東方所看見 ê 星做頭 chhoā in, 到嬰 á ê 所在, 就歇 tī hit 頂面。 10 In 看見 hit-ê 星, 歡喜到 boē 顧得。 11 入厝, 看見嬰 á kap 伊 ê 老母馬利亞; 就仆落拜嬰 á; 開 in ê 寶盒, 獻禮物 hō 伊, 就是黃金、乳香、沒藥。 12 Koh tī 眠夢中得 tiòh 指點, 教 in m̄-thang 倒 tng 去就近希律, 就 tùi 別條路倒去本所在。